

DOMINGU XXXII TEMPU KOMÚN – TINAN B

Tema

Liturjia Domingu da-32 Tempu Komún nian ko'alia mai ita kona-ba kultu loos ne'ebé ita tenke fó ba Maromak. Maromak laiha inere ba manifestasaun relijioza boboot, maibé atitude permanente ida saran-an nian iha Nia liman, disponibilidade ba Ninia projetu sira, hakohak ho laran-luak ninia dezafiu sira, serví maun-alin ho an tomak.

Leitura dahuluk apresenta mai ita ezemplu feto kiak ida nian husi Sarepta, ne'ebé, maski kiak no iha nesiedade, disponivel atu simu apelu sira, dezafiu sira no don sira husi Maromak. Feto-faluk ne'e nia istória ne'ebé fahe ho profeta ai-han uitoan ne'ebé iha, garante mai ita katak laran-liak, partilla no solidariedade la halo ema sai kiak, maibé haburas vida no vida ne'ebé naresin.

Evanjellu haktuir liuhusi feto kiak seluk, faluk ida tan, sá loos mak kultu loos ne'ebé Maromak hakarak husi nia oan sira: atu sira iha kapasidade atu oferese ba Nia buat hotu, iha doasaun kompleta, iha domin laho limite no laho kondisaun sira. Ema kiak sira de'it, katak sira ne'ebé laiha fuan nakonu ho an rasik, iha kbiit atu oferse ba Maromak kultu loos ne'ebé Nia hein.

Leitura daruak oferese mai ita Kristu nia ezemplu, amlulik-boot ne'ebé saran nia vida ba ema sira nia salvasaun. Nia hatudu, ho niia sakrifisiu, sá loos don perfeitu ne'ebé Maromak hakarak no hein husi nia oan ida-idak. Liufali osan ka soin materiál seluk, Maromak hein husi ita ita-nia moris nia don, ba projetu salvasaun ne'ebé Nia iha ba ema sira.

LEITURA I – 1 Re 17,10-16

Ita hetan iha Livru Liurai sira-nian konjuntu ida tradisaun sira-nian liga ba mori no ba asaun figura sentrál ida profetizmu bíbliku nian: profeta Elias. Tradisaun sira-ne'e mosu, ho forma intermitente, entre 1 Re 17,1 no 2 Re 2,12.

Elias (signifika "Ha'u-nia Maormak mak Na'i") – hatudu programa moris nian) atua iha Reinu Norte (Israel) durante sékulo IX mK, iha tempu iha ne'ebé maromak estranjeiru (especialmente Baal) ne'ebé tama iha kultura relijioza Israel nian tau iha perigu fiar jahwista. Provavelmente, ita iha tentativa ida atu loke Israel ba kultura sira seluk, atu fasilita interkámbiu kulturál no komersiál... Maibé sírkulu relijiozu Israel nian la komprende no l aaseita razaun polítika sira ne'e. Ministério profétiku Elias nian dezenvolve liuliu iha Acab nia ukun (873-853 mK), maski nia lian to'o mós iha Ocozias (853-852 mK) nia ukun.

Elias mak defensór boot fidelidade ba Jahwéh. Nia mosu nu'udar representante israelita fiél sira-nian ne'ebé rekuza koezisténsia Jahwéh no Baal nian iha orizonte fiar Israel nian. Iha epizódium dramátiku ida, profeta rasik sadik profeta sira Baal nian ba duelu relijiozu ida ne'ebé remata ho masakre ba Baal nia profeta 400 iha foho Carmelo (kf. 1 Re 18). Epizódium ida-ne'e, mak apresentasaun teolójikua ida luta ida lapara entre Jahwéh nia fiél sira no sira ne'ebé loke sira-nia fuan ba influénsia kulturál no relijioza povu seluk nian.

Aleinde kestaun kultu nian, Elias defende Lei iha ninia vertente hotu (.e., defeza lei propriedade nian iha 1 Re 21, iha epizódium ema hadau Nabot nia to'os): noa representa kiak sira Israel nian, iha ninia luta lakolen kontra aristokrasia no komersiante sira kbiit-na'in sira ne'ebé muda Jahwéh nia lei no ukun-fuan sira tuir sira-nia hakaran.

Siklu Elias nian hahú ho anúnsiu, iha liurai Acab nia oin, kona-ba bailoron naruk ho bee maran ne'ebé sei kona Israel (kf. 1 Re 17,1). Bailoron no bee maran la apresenta nu'udar

kastigu ida ba liurai nia salan sira, maibé liuliu forma ida atu hatudu katak Jahwéh (no la'ós Baal, maromak kananeu kolleita no fertilidade, ne'ebé Jezabel, Acab nia feen habelar) mak Na'i loos nian ba moris ne'ebé tinan-tinan, buras iha to'os no iha luhan sira. Bailoron no bee maran, lori Elias ba sidade Sarepta nian (ohin Sarafand), sidade ki'ik ida iha tasi sorin Fenícia nian, kilométru 15 iha tasi-mane Sídon nian. Ne'e mak ita-nia testu nia kontestu.

MENSAJEN

Elias to'o iha Sarepta no, hanesan Jahwéh haruka, nia bá hasoru fetu-faluk ida sidade ne'e nian. Husu ba nia bee atu hemu no paun pedasuk ida atu han. Iha tempu dramátiku hamlaha no bailoron naruk nian, fetu ne'e iha de'it fariña ka trigu liman isin ida no mina uitoan de'it, ne'ebé nia prepara atu han ho nia oan-mane, molok toba hodi hein mate; maibé nia prepara paun ba Elias... No, hodi Maromak nia kbiit, durante tempu tomak ne'ebé Elias hela iha ne'ebá, fariña nunka hotu iha sanan, nune'e mós mina iha nia fatin.

Istória ho marka popuár maibé apresenta hanorin interesante ruma...

1. Ho nia, autór deuteronomista sujere katak iha funu entre Jahwéh no Baal kona-ba sé mak boot liu, Israel nia Maromak maka manán-na'in, basá nia maka fó trigu no mina atu Povu han; seluk tan, Jahwéh atua iha ninia “funu-baluk” nia uma no iha sira ne'ebé adora lulik ne'e nia leet (Baal mak maromak populár liu iha Fenícia).
2. Benefisiáriu asaun Jahwéh nian maka fetu-faluk no oan-kiak ida atu hatudu katak Jahwéh iha domin espesiál ba fraku sira, kiak sira, sira ne'ebé la soi buat ida, sira ne'ebé presiza protesau, laran-di'ak no laran-sadia husi Maromak.
3. Paun no mina ne'ebé fetu ne'e fahe ho profeta sai barak tan. Ida-ne'e atu hatudu katak bainhira ema ida iha kbiit atu sai husi nia egoimu no iha disponibilidade atu fahe don sira simu husi Maromak, don sira ne'e to'o ba ema hotu no resin tan. Laran-luak, partilla no solidariedade la halo ema sai kiak, maibé haburas moris no moris ne'ebé naresin.
4. Istória sujere, mós katak Maromak nia grasa universál no fó ba povu hotu, lahó distinsaun rasa, fronteira ka krensa relijioza.

LEITURA II – Heb 9,24-28

Iha domingu liubá, autór Surat ba Ebreu sira apresenta Kristu nu'udar amlulik-boot ;iu hotu, la'ós iha liña saserdósiu levítiku, maibé iha liña saserdósiu Melquisedec nian... Ohin, ita hakat ba sesaun seluk (kf. Heb 8,1-9,28), iha ne'ebé autór apresenta Kristu nu'udar saserdote/amlulik perfektu no esplika perfeisaun ne'e konsiste iha sá loos no konsekuénsia sira sá de'it bele mosu ba sarani fiél sira nia vida.

Reflete tiha imperfeisaun kultu antigu (kf. Heb 8,1-6), imperfeisaun Aliansa antiga (kf. Heb 8,7-13) no sakrifísiu sir aoferese iha Templu Jerusalém nia folin-laek (kf. Heb 9,1-10), autór esplika katak Kristu nia sakrifísiu mak perfektu (kf. Heb 9,11-14) no oinsá mak liuhusi sakrifísiu ida-ne'e, Kristu sai mediador Aliansa Foun nian (kf. Heb 9,15-22). Iha parágrafu ikus sesaun ne'e nian (kf. Heb 9,23-28), autór foti konsekuénsia sira husi buat hotu nia hateten, kona-ba saserdósiu perfektu Kristu nian.

Hodi dirije ba sarani sira iha difikuldade, ne'ebé lakon tiha ona entuziazmu inisiál no, iha difikuldade sira nia oin, iha risku atu husik kompromisu asume iha lora Batizmu, autó buka anima sira atu revitaliza sira-nia esperiénsia fiar nian.

MENSAJEN

Bainhira to'o nia dalan nia rohan iha rai ne'e, Kristu, amlulik-boot perfektu, tama iha uma-lulik/santuáriu loos katak lalehan – Maromak nia realidade rasik, komuñau ho Maromak.

Moris iha komuñauñ ho Aman, Nia kontinua harohan daet / intersede ba ema sira no dispoim Aman ba ema sira nia salvasaun (vers. 24).

Enkuantu iha Aliansa tuan amlulik-boot tenke tama nafatin iha santuáriu tinan-tinan (loron espiasaun nian ka “Yom Kippur”), Kristu tama dala ida de’it iha santuáriu perfeitu, hodi lori nia raan rasik, no manán ema tomak nia salvasaun hahú husi bainhira mundu hahú to’o tempu nia rohan. Kristu nia saran-an, nia sakrifísiu hodi saran nia vida, soi efikásia totál no universál; ho nia, Kristu konsege harahun kondisaun salan nian. Umanidade husi momentu ne’e, hetan salvasaun definitiva.

Bainhira Kristu mai fali hatudu an, iha tempu nia rohan (parusia), sei la mai atu hasa’e sakrifísiu foun, la mai mós atu kondena ema; maibé atu ofereze salvasaun defintiva ba sira ne’ebé Nia, ho ninia sakrifísiu, so’i husi salan.

EVANJELLU – Mc 12,38-44

Ita-nia testu situa ita iha Jerusalém, iha loron sira molok Jez’us nia prizaun, julgamentu no mate. Jezús nia polémika sira ho representante sira Judaízm u ofisiál nian aumenta ba bebibeik. Hetok ba oin sai klaru liután katak projetu Reinu nian (ne’ebé Jezús propoin) la la’o hamutuk ho lider judiaiku sira nia vizaun relijioza. Iha ambiente nakonu ho dramatizmu, mosu xoke desizivu entre Jezús ho instituisaun judaika no prepara an daudaun ba senáriu Krús nian. Jezús iha konxiénsia katak líder sira comunidade judaika nakfilak relijiaun Moisés nian – ho ninia ritu sira, eziénsia legál sira, probisaun sira no obrigasaun sira – iha proposta mamuk no estéril ida. Tanba lider relijiozu sira la serve di’ak no halo manipulasaun, comunidade judaika sai tiha ai-figeira maran ida (kf. Mc 11,12-14. 20-26), iha-ne’ebé Maromak la hetan ai-fuan sira ne’ebé Maromak hein husi nia (kultu loos no sinseru, domin, justisa, laran-sadia). Templu rasik –espasu ida iha-ne’ebé hodi hala’o ritu kulturál barak no serimónia litúrjika boboot – husik tiha atu sai fatin enkontru Maromak nian ho comunidade israelita no sai fali fatin ida esplorasauñ no injustisa nian, “na’ok-teen sira nia luhan” (cf. Mc 11,15-19)...

Jezús bainhira hanorin iha Templu nia parte ba mane sira nia haree buat sira-ne’e hotu. Iha nia sorsorin hala’o folklore relijiozu, halo ho ritu esternu sira, ho jestu teatrál boboot, dalabarak mamuk iha konteúdu. “Doutór sira Lei nian” (jeralmente, husi partidu farizeu sira-nian; estuda no memoriza Eskritura sira no hanorin regra sira ba dixípulu sira – eh “halakot” – ne’ebé tenke diri je israelita fiél ida-idak nia morisn nia ain-hakat sira), ho sira-nia hatais spesiál no hatudu an katak sira iha direitu ba onra, priviléjiu sira mak elementu seluk tan Jezús haree.

Iha feto sira-nia parte fali, Jez’us repara katak feto-faluk ida tau iha kaixa Templu nian, ninia oferta ki’ik-oan ida (karik atu kumpre votu). Feto-faluk sira iha ambiente palestinu tempu ne’ebá nian (liuliu sira ne’ebé la iha oan atu proteje no fó han ba sira), mak modelu klásiku ema kiak, hetan esplorasauñ, ema fraku.

MENSAJEN

Ita-nia testu fahe ba parte rua. Iha parte dahuluk (vers. 38-40), Jezús lori nia eskolante sira-nia atensaun ba grupu doutór lei sira-nian. Jezús nia matan kro’at hakat liu aparénsia grupu ne’e ninia hahalok. Nia haree katak sira laran-makerek, ipókrita no inkoerente: halo sasán sira, la’ós tanba konviksaun, maibé atu ema sira konsidera sira no admira sira; sira buka fatin dahuluk, hatudu an, halo kumprimentu ritu no regra sira Lei nian hanesan espetákulu ida atu ema seluk basa liman... Sira-nia moris maka programa ida lia-bosok nian, inkoerénsia nian, laran-makerek nian... Hanesan buat ne’e la to’o, doutór Lei nian sira-ne’e, dala barak, aproveita sira-nia pozisaun no konfiansa ne’ebé ema fó ba sira – nu’udar intérprete

autorizadu Maromak nia Lei nian – atu esplora ema kiak sira; sira uza relijiaun atu habosu sira-nia kaanten, esplora fetu-faluk sira ne'ebé husu sira administra rikusoin sira-nian, halo korrupsaun no esplorasaun...

Doutór Lei nian sira-ne'e ho sira-nia hahalok ipókrita, hatudu katak ritu esternu, jestu teatru nian, kumpre regra sira ho modu korretu la to'o atu lori ema hakbesik ba Maromak no Ninia santidade. Hodi hateke ba doutór Lei sira nia atitude, Jezús nia eskolante tenke sai konxiente katak ida-ne'e la'ós komportamentu ne'ebé Maromak husu ba sira ne'ebé hola parte ba Ninia família.

Iha parte daruak (vers. 41-44), Jezus konvida eskolante sira atu komprende kultu loos nia esénsia, atitude relijioza loos. Nu'udar kontraste ho doutór Lei sira-nian, Jezús hatudu figura fetu-faluk ida-nian, ne'ebé hakbesik ba fatin ezmola sira iha Templu. Fetu ne'e tau doit rua (testu gregu dehan "leptá", osan judaika ki'ik liu); maibé, buat ne'e de'it mak nia soi. La iha ema ida, menus Jezús, maka repara iha nia ka manifesta admirasaun ba ninia jestu. Jezús mesak – ne'ebé lee faktu sira ho Maromak nia matan no hatene hakat liu aparénsia sira – komprende iha doit folin-laek rua ne'e don totál, despojamentu kompletu, entrega radikál no sasukat-laek. Enkontru ho Maromak, kultu ne'ebé Maromak hakarak hatudu liuhusi jestu simples no haraik an, ne'ebé karik ema la nota, maibé sinseru, loos, no esprime entrega laran-luak no kompromisu totál. Fiar-na'in loos la haburas jestu teatru nian no atu ema admira, atu impresiona ema lubun-boot no hetan basa liman husi ema sira; fiar-na'in loos mak ida ne'ebé aseita atu hamamuk an husi buat hotu, husi ninia interese no projetu pesoál sira, atu bele saran an kompletu no gratuitamente iha Maromak nia liman, ho haraik-an, laran-luak, konfiansa totál, domin loos. Ida-ne'e mak ezemplu ne'ebé Jezús nia eskolante sira tenke banati; ne'e maka kultu loos sira tenke hasa'e ba Maromak.